

Tupa avatangiisinillu tupatorfiunngitsunik isumannaarineq, kiisalu tupanik nioqqutissat nalunaaqutserneqartarneri pillugit Inatsisartut peqqussutaat nr. 10, 14. november 2004-meersoq

Kalaallit Nunaanni Peqqinnissaqarfik pillugu inatsimmi nr. 369-imi, 6. juni 1991-imeersumi, § 1 aamma § 3, imm. 1 aamma imm. 2, malillugit aalajangersarneqarput:

Atuuffia

§ 1. Peqqussummi pineqarput nioqqutissat tamarmik tupap naasuanit (Nicotianamit) suliarineqarsimasut, tassunga ilanngullugit sikaritsit, sikaat, sikaavaqqat, serutsit, imassat, tupat imusassat, sunoorsit sukuluussallu il.il.

§ 2. Avatangiisit pujortarfiunngitsut pillugit peqqussumi malittarisassat Namminersornerullutik Oqartussanut kommuninullu taamaallaat atuupput, taakkununga ilanngullugit suliffeqarfiit taakkua ingerlataat aamma Namminersornerullutik Oqartussat suliffeqarfiutaat namminersortitat.

Imm. 2. Avatangiisit pujortarfiunngitsut pillugit malittarisassanut ilaangillat Hans Egedep Illua aamma pisortat illuutaanni ineqartut namminerisaminnik inaat inersimasunuinnaq angerlarsimaffiusut, soorlu assersuutigalugu utoqqaat angerlarsimaffii aammalu innarluutillinnut ulloq unnuarlu paaqqinnittarfiit

Imm. 3. Avatangiisit pujortarfiunngitsut pillugit malittarisassat aammattaaq ingerlatseqatigiiffinnut, suliffeqarfinnut il.il. erseqqinnerusumik taaneqartunut, pisortat ingerlatsiviinut ilaasutut inatsisit tungavigalugit taaneqarsinnaanngitsunut atuutsinneqarnissaat pillugu malittarisassanik Naalakkersuisut aalajangersaasinnaapput. Tamannali aatsaat atuuppoq pineqartut ingerlatsinerminni aningaasartuutaasa annertunersaat Namminersornerullutik Oqartussanit kommuninilluunniit matussuserneqartarata, imaluunniit ingerlatseqatigiiffiit, suliffeqarfiit il.il. annertunersaat taakkunanga pigineqarata.

Avatangiisit pujortarfiunngitsut

§ 3. Pisortat illuutaanni pujortarneq inerteqqutaavoq, taamaattorli takuuk imm. 2.

Imm.2. Pujortarneq inerteqqutaanngilaq inini pujortartartunut immikkut aaqqissuunneqarsimasuni, taamaattorli takuuk § 5.

Imm. 3. Pujortartarfittut immikkut aaqqissuussisoqarnissaa aalajangerneqassaaq pineqartumi siulersuisunit, paaqqinnittarfiit siulersuisunit, kommunalbestyrelsemit il.il.

§ 4. Angallassitutini kikkunnit tamanit atorneqartartuni pujortarneq inerteqqutaavoq, taamaattorli takuuk imm. 2.

Imm.2. Umiarsuarni aalajangersimasumik ingerlaarfilinni pujortartoqarsinnaavoq inini pujortartarfittut immikkut aaqqissuussani.

Imm.3. Nunanut allanut nunanillu allanit aqquqit peqqussummi ilaatinneqanngillat.

§ 5. Meeqqat atuariini, timersortarfinni, naluttarfinni, ulluunerani paaqqinnittarfiit aamma meeqqanut inuusuttunullu ulloq unnuarlu paaqqinnittarfinni pujortarneq inerteqqutaavoq. Tamanna illup iluani silataanilu atuuppoq.

§ 6. §§ 3-5-imi aalajangersakkat apeqqutaatinnagit nalliuttorsiornerni pingaarutilinni pujortarneq akuerigallarneqarsinnaavoq.

Imm.2. §§ 3-5-imi aalajangersakkat avaqqullugit immikkut akuersinissaq, takuuk imm. 1, pineqartumi aqutsisunit, paaqqinnittarfiup siulersuisuinit, kommunalbestyrelsemit il.il aalajangerneqarsinnaavoq.

§ 7. Init pujortartarfittut aaqqissuussat, takuuk § 3, imm. 2, aamma § 4, imm. 2, allagartaliinikkut nalunaaqutserneqassapput, takuneqarsinnaassalluni inimi tassani pujortartoqarsinnaasoq.

Imm.2. Sapinngisamik silaannarissakulaarnikkut imaluunniit pitsaasumik silaannarissaateqarnikkut pujumik akornutaasut annikillismaartinneqassapput.

Tupanik nioqqutissianik nioqquteqarneq

§ 8. Inunnut 18-it inorlugit ukiulinnut tupanik nioqqutissianik tuniniaasoqaqqusaanngilaq.

Imm.2. Tupanik nioqqutissianik tuniniaaneq pisiniartitsisumit pisinneqarnikkut taammallaat pisinnaavoq.

Imm.3. Inuk 18-inik ukioqalersimanerminik pisariaqartumik uppersaateqarnersoq nioqquteqartup pisiniarfiullu tuniniaasup qulakkiissallugu akisussaaffigaat, takuuk imm. 1.

§ 9. Tupanik nioqqutissiat ataasiakkaarlugit nioqqutigineqassanngillat. Tassunga ilaanngilaq sikaanik nioqquteqarneq.

Tupanik nioqqutissianik nalunaaqutsersuineq

§ 10. Tupamik atuinerup peqqinnissamut peqqinnermullu navianartumik sunniuttarneranik mianersoqqussummik tupanik nioqqutissiat tamarmik erseqqissumik nalunaaqutserneqarsimassapput. Mianersoqqussut kalaallisut danskisullu allassimassaaq.

Imm.2. Mianersoqqussutit qanoq oqaasartaqartinneqarlutillu iluseqartinneqarnissaat pillugit malittarisassanik Naalakkersuisut aalajangersaassapput.

§ 11. Tupanik nioqqutissiat tamarmik usserummik aamma nikotininimik qanoq annertutigisumik akoqarnerinik paasissutissartaqartinneqassapput. Paasissutissat kalaallisut danskisullu allassimassapput.

Tupanik nioqutissiat pilerisaarutigineqarneri

§ 12. Tupanik nioqutissiat allagarsiussatigut, allagartarsuartigut allatigulluunnit pilerisaaruteqartoqaqqusaanngilaq.

Imm.2. Tupanik nioqutissianik pilerisaarutinut sunulluunniit inerteqquteqarneq nalunaaqutsersuutit, saqqarmiut, ilisarnaatit allatulluunniit takussutissiat atornerisigut sanioqqunneqassanngilaq.

Imm.3. Immikkoortoq 1-imi aamma 2-mi inerteqqutinut ilaangillat aviisit, atuagassiat, aviisit assiliartalersukkat assigisaallu Nunatsinnut eqqunneqartartut.

§ 13. Tupanik misiligutissanik akeqanngitsumik agguaaneq inerteqqutaavoq.

Pineqaatissiisarnerit

§ 14. § 8-mi, imm. 1 aamma 2-mi, § 9-mi, § 10-mi, imm. 1-imi, § 11-mi, § 12-imi, imm. 1 aamma 2-mi, aamma § 13-imi aalajangersakkanik unioqutitsinermi akiliisitaasussanngortitsilluni pineqaatissiisoqarsinnaavoq.

Imm.2. Aktiaateqarluni ingerlatseqatigiiffik, piginneqataassuteqarluni ingerlatseqatigiiffik, piginneqatigiiffik taamaaqataalluunniit imm. 1-imi pineqartumik unioqutitsippat ingerlatseqatigiiffik immiini unioqutitsinermut akiliisitaasussanngorlugu akisussaatinneqarsinnaavoq. Namminersornerullutik Oqartussat, kommuni imaluunniit kommunit ataatsimoorlutik ingerlassaqarfii unioqutitsisimappata Namminersornerullutik Oqartussat, kommunalbestyrelse imaluunniit kommunit ataatsimoorlutik ingerlassaqarfii taamatut akiliisitaasussanngorlugit akisussaatinneqarsinnaapput.

Atuutilerfia

§ 15. Inatsisartut peqqussutaat ulloq 1. januar 2005 atuutilerpoq.

Imm. 2. Peqatigitillugu Tupa avatangiisinillu tupatorfiunngitsunik isumannaarineq, kiisalu tupanik nioqutissat nalunaaqutserneqartarneri pillugit Inatsisartut peqqussutaat nr. 4, 23. maj 2000-imeersoq atorunnaarsinneqarpoq.

Imm. 3. Tupamit tunisassiat nioqutissap suuneranik dansk-isunnarluunniit nalunaarsorneqaralarpata tuniniarneqarsinnaapput, tak. § 11, tupamit nioqutissiaq 2005-imi jannuaarip aallaqqaatigitinnagu Nunatsinnut eqqunneqarsimappat.

Namminersornerullutik Oqartussat, ulloq 14. november 2004

/

Asii Chemnitz Narup